

Forskrift om skulereglar Vindafjord kommune

Med heimel i lov 9. juni 2023 nr. 30 om grunnskulen og den vidaregåande opplæringa (opplæringslova) §10-7.

§1 Formål og verkeområde

Reglane skal bidra til at barn og unge i grunnskulen har eit trygt og godt skulemiljø der dei trivst, lærer og opplever å høyre til i fellesskapet.

Forskrifta gjeld for alle elevar i grunnskulen både i skuletida, på skulevegen, på SFO og ved arrangement under leing av skulen.

§2 Omsynet til eleven sitt beste og retten til å bli høyr

I alle saker som vert handsama etter desse reglane skal omsynet til eleven sitt beste vere grunnleggande. Skulen skal også ta i vare eleven sin rett til å bli høyr.

§3 Organisering av skuledemokratiet

Det skal vere elevråd på alle kommunale grunnskular som er valt av elevane på skulen. Dersom elevane ønskjer ei anna organisering enn elevråd, må det takast stilling til kvart skuleår. Korleis elevane ønskjer å organisere seg, kan vere ein naturleg diskusjon ved oppstarten av skuleåret. Skulen må leggje til rette for og støtte opp under elevdemokratiet, uansett organisasjonsform elevane vel.

Alle grunnskular skal ha eit arbeidsutval som er valt av foreldra på skulen.

På kvar skule skal det vere eit samarbeidsutval. Elevane skal delta med minst to representantar frå elevrådet, føresette to representantar frå foreldrerådet. Frå dei tilsette skal både undervisningspersonell og andre tilsette vera representert med minst ein person frå kvar. Kommunen skal vera representert med minst ein person, som skal vera ein administrativ representant eller politiskar. Rektor/einingsleiar er fast medlem og har ansvar for å legge fram saker som angår skulen sin drift og utvikling. Samarbeidsutvalet skal bestå av like mange representantar for foreldre/føresette, elevane og dei tilsette og kommunen. Dette sikrar at alle relevante grupper er representert og har medbestemming i saker som angår skulens arbeid og læringsmiljø.

§4 Åtferd

Alle skal visa omsyn og respekt for andre og eigendelane deira, slik at ein ikkje skadar, sårar eller er til plage for medelevar eller andre personar på skulen.


Det er ikkje lov å bruka eller ta med nokon form for rusmidlar på skulen.

§5 Undervisningssituasjonen

Det skal vera ro og orden i samband med opplæringa. Elevar skal møta førebudde, vera punktlege, visa god arbeidsinnsats, ha med nødvendige læremiddel og følgja opp avtalt arbeid.

§6 Eigedom

Alle har rett til å ha tinga sine i fred. Skade på eigedom kan måtta reparerast eller erstattast.



§7 Mobiltelefon og klokke med meldingsfunksjon

Mobiltelefon og klokke med meldingsfunksjon skal ikkje nyttast i skuletida og SFO.

Tilsett kan gi unntak i samband med undervisning.

§8 Konsekvensar ved brot på skulereglane

1. Samtale med eleven
2. Mobiltelefon kan bli dregen inn og oppbevart til slutten av dagen. Rusmiddel og farlege gjenstandar som vert tekne inn blir utlevert til føresette om dei ber om det (dette i tråd med retningslinjene til Udir).
3. Melding heim, skriftleg eller munnleg. Eleven skal vera orientert ved melding eller merknad.
4. Samtale med elev og foreldre/føresette
5. Eleven kan i ein periode få avgrensa rettar på skulen.
6. Ved gjenteken bruk av mobiltelefon eller klokke med meldingsfunksjon kontaktar skulen heimen.
7. På ungdomsskulen skal det vurderast om brotet fører til nedsett karakter i orden eller åtferd (jmfr. Vurderingskriteria i orden og åtferd).
8. Utvising frå skulen etter gjeldande reglar (jmfr. Opplæringslova §13-1)

"Kommunen kan fastsetje i skulereglane at elevar på årstrinna 8-10 som alvorleg eller fleire gonger bryt reglementet, kan visast bort frå undervisninga i inntil tre dagar, og at elevar på årstrinna 1-7 kan visast bort frå undervisninga for enkelttimar eller for resten av dagen.

Rektor/einingsleiar sjølv vedtek bortvising etter å ha rådført seg med lærarane til eleven. Før det blir gjort vedtak, skal ein ha vurdert å bruke andre hjelpe- eller refsingstiltak. Foreldra til elevar på årstrinna 1-7 skal varslast før det blir sett i verk bortvising for resten av dagen.

Med mindre kommunen fastset noko anna, kan rektor/einingsleiar bestemme at lærarane skal ha mynde til å ta avgjerd om bortvising frå eiga undervisning for ei opplæringsøkt, avgrensa til to klokketimar."

ELEVEN HAR RETT TIL Å UTTALA SEG / BLI HØYRT FØR TILTAK VERT SETT I VERK.

§9 Lokale konkretiseringar

Ved skule gjeld desse lokale reglane:

§10 Iverksetjing og opphøyr

Forskrifta trer i kraft 1. mars 2025

